

Izjava ambasadora Upravnog odbora Vijeća za implementaciju mira povodom sastanka u vezi sa Srebrenicom

Ambasadori Upravnog odbora Vijeća za implementaciju mira pozvali su danas institucije Bosne i Hercegovine i političke lidere ove zemlje da poštuju presudu Međunarodnog suda pravde u predmetu Bosne i Hercegovine protiv Srbije i Crne Gore. Oni su naglasili kako svi moraju priznati da se u Srebrenici desio genocid. Ambasadori Upravnog odbora također su istaknuli da, u skladu sa pomenutom presudom, države imaju obavezu da sarađuju sa Međunarodnim krivičnim tribunalom u Hagu, i ta obaveza mora biti ispoštovana u potpunosti.

U vezi sa sastankom u Srebrenici koji je organizirao načelnik opštine, i na kojem su predstavnici bosanskohercegovačkih institucija i političkih stranaka potpisali dokument, ambasadori Upravnog odbora su istaknuli da sve strane moraju poštovati Dejtonski mirovni sporazum te nadležnosti institucija BiH, entiteta i opština.

Ambasadori Upravnog odbora su naglasili da je status opština u Bosni i Hercegovini reguliran ustavima i relevantnim zakonima Bosne i Hercegovine i njenih entiteta. Bilo kakve promjene mogu se postići samo u skladu sa odredbama sadržanim u tim ustavima i zakonima.

Međunarodna zajednica je učinila mnogo kako bi osigurala održiv povratak u Srebrenicu, između ostalog pružanjem humanitarne i ekonomske pomoći. Međunarodna zajednica će nastaviti pružati pomoć i također će nastaviti pomagati u

identifikaciji žrtava genocida.

Međutim, odgovornost za pitanja koja se tiču ekonomskog i socijalnog napretka u Srebrenici je u rukama nadležnih institucija ove zemlje, koje bi trebale raditi zajedno kako bi poboljšale živote svih građana Srebrenice i unaprijedile proces pomirenja.

Ambasadori Upravnog odbora Vijeća za implementaciju mira su također pozvali državne i entitetske organe vlasti da sarađuju kako bi poboljšali ekonomske, socijalne i političke uslove u Srebrenici, te time potaknuli razvoj, investicije i stvaranje novih radnih mjesta.